



Yihoowakko Simma

Siiqo ishawu woy michee:

Geeshsha Maxaafay darosan asaabaa yootees. Etappe daroti nuna gakkiiyaagaa mala daro paacee gakkishinkka Xoossawu ammanettidi de'idaageeta. Eti "nu mala asa." (Yaaqooba 5:17) Issoti issoti banttana gakkida metuwan un'ettidosona. Harati qassi soo asay woy etaagaadan Xoossawu oottiya uri yiilloyiyaabaa oottin keehi qohettidosona. Amaridaageeti qassi bantta oottido nagaraa gaasuwan keehi un'ettidosona.

Eti dumma dumma gaasuwan Yihoowappe haakkidosona; shin eti Yihoowa tixxi ootti aggidonaa? CHIikka. Etappe daroti, "Taani bayida dorssadan bichchaarais; tana ne ashkkaaraa koya; aissi giikko, taani ne azazuwaa dogabeikke" yaagida mazamuraawiyaa mala. (Mazamure 119:176) Ne hanotaykka hegaa malee?

Wudiyaappe shaahettidi bichaariya ba ashkkarata Yihooway mule dogenna. Ubba i etakko shiiqanawu koyees; qassi hegaadan oottanawu darotoo hara Kiristtaaneta go'ettees. Leemisuwawu, Yihooway aqoy xayin keehi me-tootida, siiqiyoogeti hayqqin kayyottida, qassi keehi sahettidanne hara darobaa genccida ba ashkkaaraa lyyooba waati maaddidaakko akeeka. A minttettana bessiya asati a qohiyaabaa haasayishinkka lyyoobi gencciis. lyyoobi issi issitoo balabaa qoppidaba gidikkokka, Yihoowa bolli mule makkalibeen-na. (lyyooba 1:22; 2:10) Yaatin, lyyoobi zaarettidi suure qoppaanaan Yihooway waati maaddidee?

Yihooway lyyooba maaddido ogetuppe issoy a laggiiyaa Eelihi baggaara minttettiyoogaa. lyyoobi bana qofissidabaa yootiyo wode, Eelihi loytti ez-ggiis; qassi a maaddiya qofaa yootiis. I woyganeeshsha? I lyyooba boridee, woy i zil'ettidi woy yeellatidi ba qofaa suurissanaadan oottidee? Eelihi i lyyoobappe kehiyaabadan qoppidee? Hegaadan mule qoppibeenna! Xoos-saa ayyaanay denttettin Eelihi, "Be7a, taani Xoossaa sinttan ne mala; qassi taanikka urqqaappe merettaas" yaagiis. Ubba i lyyooba, "Neeni taassi yayi-yo gaasoi baawa; taani nena naaqqikke" yaagidi minttettiis. (lyyooba 33: 6, 7) lyyooba yaa un'ettiyoogaappe, Eelihi a siiquwan zoriisinne minttettiis.

Nuunikka hegaadan qoppidi ha brooshuriyaa giigissidoogaa hayyanaa hassaya. Koyro, tumaa ogiyaappe wora simmida darotuyyo siyettiyaabaa akeekan ezggida; qassi eta hanotaa akeekida. (Leemiso 18:13) Yaatidi, he-gaa mala metoy gakkido asata Yihooway beni waati maaddidaakko Geeshsha Maxaafan de'iya qofaa pilggida, qassi woossida. Wurssettan, Geeshsha Maxaafan de'iya he taariketa ha wodiyaa hanotaara gatti xeellidi ha broo-shuriyaa giigissida. Neeni ha xuufiyaa loytta pilgganaadan minttettoos. Nuuni nena wozanappe siiqiyooqaa hassaya.

Yihoowa Markkata Bolla Gididi Keemmiyaagaa





SHAAHO 1

YIHOOWAKKO SIMMANA KOSHSHIYOY AYBISSEE?

Beni de'ida Yihoowa asaakka nuugaa mala metoy gakkiiis. SHin Yihooway eta maaddiis; i ba gelido qaalaa maaran nunakka maaddana. Akeekanchanne siiqiya hanttanchaadan, Yihooway bayida ba dorssata koyidi, eti baakko simmanaadan shoobbees.

SHAAHO 2-4

SIMMIYOOGEE METANAADAN OOTTIYAABAY AYBEE?

Xoossaayyo ammanettidi oottiyaageetikka issi issitoo keehi hirggidosona, haratu hanotan qohettidosonanne bantata hanotan zill'ettidosona; hegee qassi eti oottana bessiyaabaa maara oottanaadan diggiis. Eti genccanaadan, ba asaara zaarettidi hashetanaadaaninne kaseegaadan ufayttanaadan Yihooway waati maaddidaakko be'a.

SHAAHO 5

YIHOOWAKKO WAANA SIMMANA DANDDAYAY?

Neeni akko simmanaadan Yihooway koyiyooгаа bessiya leemisota be'a. Amarida Kiristtaaneti Yihoowakko waani simmidaakko, gubaa'iyan de'iyaageeti eta waati mokki ekkidaakko, qassi eti zaarettidi mishetti oottanaadan cimati waati maaddidaakko akeeka.



1

“Taani Bayidaageeta Koyana”

Dorssay barkka attidoogaa akeekidi haniyoobaa xayii uttiis. He dorssay maataa miiddi wudiyaappe duuxxiis. Ha”i i henttanchaakka wudiyaakka be’ana danddayenna. Sa’ay xuummiiddi de’ees. A qohiya darobay de’iyo wombban xayida ha dorssay bana qohuwaappe teqqana danddayenna. Wurssettan, henttanchaa cenggurssaa siyiis, hegee i kasekka eriyo cenggurssa; yaatin henttanchay akko woxxidi bees, tookki denttidi ba maayido qumaashshan xaaxidi soo efees.

YIHOOWAY darotoo i heгаа mala henttancha gidiiyoogaa yootiis. I ba Qaalan, “Taani ta huuphen ta dorssata xomoosananne koyana” yaa-giis.—Hizqqeela 34:11, 12.

“Ta Qooruwan Miya Dorssata”

Yihoowa dorssati oonee? Yihoowa dorssati a siiqiyaanne awu goynniya asata. Geeshsha

Maxaafay hagaadan gees: “Hokkidi ane ayyo goinnoos; nuna medhdhida GODAA sinttan gulbatoos. Aissi giikko, i nu Xoossaa. Nuuni a qooruwan de7iya asata; nuuni i heemmiyo a dorssaa wudeta.” (Mazamure 95:6, 7) Henttanchaa kaalliya dorssaadan, Yihoowa ashkarati ufayttidi bantta Henttanchaa kaalloosona. SHin eti aynne balenna asee? CHii, gidokkona. Xoossawu oottiya

Bayida dorssay mule simmana danddayenna giidi Yihooway qoppenna.
He dorssay beettiyo wode i keehi ufayttees

asati issi issitoo 'bayida dorssa,' qassi "oge balida dorssa mala" gididosona. (Hizqqeela 34:12; Maatiyoosa 15:24; 1 PHeexiroosa 2:25) Ubba issi uri wora biyo wodekka, Yihooway he uri simmen-na giidi mule qoppenna.

Ha"ikka Yihoowa ne Henttanchadan xeellay?
Yihooway Henttancha gidiyooгаа ha wodiyan waati bessii? Heezzu ogeta be'a:

Ayyaanaaban nuna mizees. Yihooway, "Taani eta lo77o qooruwan heemmana; . . . Hegan eti lo77o qoroosi de7iyo Israa7eela keratu bolli heemettanne allaxxana" yaagees. (Hizqqeela 34:14) Yihooway minttettiya ayyaanaabaa qumaa nuuyyo immennan mule aggi erenna. Nena metidabawu woossin hegawu zaaro gidiyaabay xuufiyan, haasayan woy biiduwan qonccidaagaa hassayay? Hegee Yihooway neeyyo qoppiyoogaa bessiyaaba gidennee?

Nuna naageesinne maaddes. Yihooway, "Wora biidaageetakka zaarana; meqqidaageeta koolana; harggidaageetakka pattana" yaagiis. (Hizqqeela 34:16) Yihooway un"ettidi wolqqaa wuridaageeta woy hidootaa qanxxidaageeta minttees. I ba dorssata koolees; hegeekka, hara Kiristtaanetun qohettidaageeta gidikkokka pattees. Qassi wora simmidaageetanne bessennabaa qoppidi un"ettiyaageeta ba soo zaarees.

Nubaa loytti qoppees. Yihooway, "Eti laalettido soho ubbaappe taani eta shiishshana. Taani bayidaageeta koyana" yaagees. (Hizqqeela 34:12, 16) Yihooway bayida dorssaa mule simmana danddayennabadan qoppenna. Issi dorssay xayiyo wode, i hegaa akeekees; he dorssaa koyees; qassi demmiyo wode keehi ufayttees. (Maatiyoosa 18:12-14) I tumuppe bawu goynniyaageeta, "Intte ta dorssata; ta qooruwan miya dorssata" yaagees. (Hizqqeela 34:31) Neenikka hegeetuppe issuwaa.

"Nu Beni Bonchchuwaa Zaarada, Nuna Ooraxissa!"

Yihooway nena koyiyoy, qassi neeni akko simmanaadan shoobbiyoy aybissee? I neeni ufayttanaadan koyiyo gishshataassa. Yihooway ba dorssattuyyo 'anjuuwaa iraaadan bukkissanaagaa' yootiis. (Hizqqeela 34:26, NW) Hegee tuma gidida hidoota. Hegee tuma gidiyooгаа neenikka ne de'uan be'adasa.

Neeni Yihoowa eriyoy wode neeyyo siyettidabaa qoppa. Leemisuwawu, Yihoowa sunttaaranne i asaa naatuyyo halchidobaara gayttida keehi ufayssiyaabaa koyro erido wode neeyyo aybi siyettidee? Gubaa'e shiiquwaaninne gita shiiqotun nu mala Kiristtaanetuura issippe goynniyoogee nena ay keena woppissidaakko hassayay? Suure wozanaa koshshay de'iyoy urawu mishiraachuwa odada keehi ufayttada so simmido wodiyaabaa shin?

Neeni ha"ikka zaarettada hegaadan ufayttana danddayaasa. Beni wode de'ida Xoosaa ashkkarati hegaadan giidi woossidosona: "Abeet GODAU, nuna neekko zaara; nuunikka simmana! Nu beni bonchchuwaa zaarada, nuna ooraxissa!" (Ermmaasa Zilaassaa 5:21) Yihooway eta woosaa zaarin, a asay zaarettidikka kaseegaadan ufayttidi ayyo oottiyoogaa doommiis. (Nahimiyaa 8:17) Yihooway nenakka hegaadan maaddana.

Gidikkokka, Yihoowakko simmiyoogee metana danddayees. Hegee metanaadan oottiya issi issibaanne hegaa xoonana danddayiyo ogiyaa be'a.

HIRGGAA

‘Ubba Baggaarakka Un"ettiyoogaa’

“Ta azinaara aqo de’uwan 25 layttaa issippe de’idi paraman shaahettida. Ta naati Yihoowawu oottiyoogaa aggidosona. Qassi tana keehi wolqqaama gidida darobay sakkees. Hegaappe denddidaagan un'ettaas. Taani keehi un'ettido gishshawu haniyoobaa xayaas; ubba hegaappe simmin aybanne genccana danddayennabandan qoppaas. Ubba, gubaa'iyaa biyoogaanne gubaa'iyaa hashetiyoogaa aggabayaas.”—Juuno.

XOOSSAA asaa gujjin, ubba asaakka hirggis-siyaabay gaktees. Mazamuraawee, ‘Tana hirggay woriis’ yaagiis. (Mazamure 94:19) Ha wursetta wodiyan daroti Yihoowawu oottanawu metootanaadan oottiya waannabay ‘aqossi hirggiyoogaa’ gidanaagaa Yesuusi kasetidi yootiis. (Luqaasa 21:34) Neeni shin? Miishshaa metoy woy so asaa de’uwaaranne payyattaara gaytidabay nena hirggissii? Neeni heгаа genccanaadan Yihooway nena waati maaddana danddayii?

‘Ubbaappe Aadhiya Wolqqa’

Hirggissiyaabaa nuuni nurkka xoonana danddayokko. Kiitettida PHawuloosi, “Nuuni ubba baggaarakka un'77ettida; . . . ; issi issi wode siroos; . . . ; qassi nu morkketi nuna oli bayidosona” yaagiis. SHin i, “me7erettibookko,” “muleerakka aggi bayana gibookko,” qassi “xayibookko” yagidoogaakka akeeka. Genccanaadan nuna maaddiyaabay aybee? ‘Ubbaappe aadhiya wolqqa’—Ubbaa Danddayiya nu Xoossaa Yihoowappe yiya wolqqa.—2 Qoronttoosa 4:7-9.

‘Ubbaappe aadhiya wolqqa’ neeni kase demmido issi issi hanotaa qoppa. Yihoowa aggenna siiquwaa loytta akekanaadan maaddida minttettiya haasayaa hassayay? Gannatiyaa hidootaabaa haratuuyo yootiyo wode, Yihooway gelido qaala kaseegaappe aaruwan ammanabeykkii? Gubaa'e shiiquwaa shiiqiyo wodenne nu ammanuwaabaa haratuuyo yootiyo wode, nuna hirggissiyaabaa gencnanawu maaddiya minttettuwanne sarottetta demmoos; hegee qassi Yihoowawu ufaysan oottanaadan maaddees.

‘Yihooway Keha Gidiyoogaa Xeella Be'a’

Neeni issi kutti oottana bessiya darobay de'yaabandan qoppada un'ettana danddayaasa. Leemisuwawu, Yihooway nuuni a Kawotettaa ubbabaappe kaseyanaadaaninne ubbatoo ayyaanaabaa minnidi oottanaadan koyees. (Maatiyoo-sa 6:33; Luqaasa 13:24) SHin, ixuwaa, sahuwaa woy so asaara gayttida metuwaa gaasuwan neeni hegaara gayttidaagan koyiyoogaa keena oottana danddayennaba gidikko shin? Woy neeni gubaa'iyaa hashetana bessishin ne oosoy ne wolqqaanne wodiya wurssiyaaba gidikko shin? Neeni oottana bessiya darobay de'yaaba, qassi heгаа ubbaa polanawu neeyyo de'iya wodenne wolqqa guutta gidikko, un'ettana danddayaasa. Ubba issi issitoo, ‘Yihooway taani oottana danddayiyoogaappe daruwaa taappe koyiye?’ gaada qoppana danddayaasa.

Yihooway ne hanotaa loytti akeekes. I nuuni ayyo immana danddayiyoogaappe daruwaa nuuppe mule koyenna. Nuuni asatettaaninne qofan qohettiyo wode, issi kutti kaseegaadan hanana danddayennaagaa i erees.—Mazamure 103:13, 14.

Leemisuwawu, Yihooway hananabaa yootiya Eelaasa waati gazddissidaakko akeeka. Eelaasi yayyidinne hidootaa qanxxidi bazzo biido gishshawu, Yihooway a seeridi i ba oosuwaakko simmanaadan yootidee? CHIikka. A leddan beegotisidi qumaa mizanaadan Yihooway issi kiitanchaa naa"utoo kiittiis. SHin Eelaasi 40 gallasaappe



Yihooway nuuni ayyo immana danddayiyoogaappe daruwa nuuppe mule koyenna

simminkka un'ettiisinne yayyiis. Yaatin Yihooway a maaddanawu harabaa ay oottidee? Koyruwan, Yihooway a naagana danddayiyoogaa bessiiis. Naa'anttuwan, Yihooway 'saasukkettan' Eelaasa minttettiis. Wurssettan, Xoossawu ammanettidi oottiya sha'an qoodettiyaageeti de'iyooogaa i ayyo yootiis. Sohuwaara, Eelaasi kaseegaadanka mishettidi hananabaa yootiyoogaa doommiis. (1 Kawotu Maxaafaa 19:1-19) Nuuni hegaappe ay tamaariyoo? Eelaasi keehi hirggido wode, Yihooway a danddayaaninne qaretan oyqqiis. Yihooway ha"ikka laamettibeenna. Yihooway nunakka maaddes.

Neeni Yihoowawu immana danddayiyoobaa xeeliyaagan suure gididabaa qoppa. Ha"i neeni oot-tana danddayiyoobaa kase neeni oottidobaara geeddarsooppa. Ane haggaa qoppa: Issi wottanchay daro aginawu woy layttawu meezetiyooogaa aggikko, zaarettidi issi kutti kaseegaadan wox-xana danddayenna. I bana minttiyaanne oottanawu metenna issi issi guuttabaa oottiyoogan doommes. Kiristtaanetikka wottancha mala. Eti demmana woytuwaa tishshi oottidi xeelliiddi woxxoosona. (1 Qoronttoosa 9:24-27) Neeni ayyaanaaban sohuwaara oottana danddayiyo issibaa polanawu halchana danddayaasa. Leemi-

suwawu, gubaa'e shiiquwaa baanawu halchana danddayaasa. Neeni qoppidobaa polanawu maaddana mala Yihoowa woossa. Neeni ayyaanaaban kaseegaadan minniyo wode, 'Yihooway keha gidiyooogaa xeella be'ana.' (Mazamure 34:8) Neeni Yihoowa siiqiyooogaa bessanawu oottiyo ubbabaa, ubba guutta milatiyaabaykka i xoqqu oottidi xeelliyooogaa hassaya.—Luqaasa 21:1-4.

“Taani Koyaydda Takkido Minttettuwa”

Yihooway Juuna akko simmanaadan waati maaddidee? A hagaadan gaasu: “Yihooway tana maaddana mala aggennan woossaas. Yaatin, ta na'aa machiyaa taani de'iyoo kataman gita shiiqoy de'iyooogaa tawu odaasu. Taani he shiiquwaa issi gallassaa baanawu qofaa qachaas. Taani zaarettada Yihoowa asaara issippe shiiqidoogan keehi ufayttaas! Taani koyaydda takkido minttettuwa he gita shiiquwan demmaas. Ha"i zaarettada Yihoowawu ufayssan oottays. Taani ha"i ta de'uan keehi ufayttays. Qassi ta ishanttupenne michonttuppe shaahettada de'ana danddayennaaganne eta maadoy tawu koshshiyooogaa ha"i kaseegaappe aaruwan akeekaas. Taani Yihoowakko simmanaashin wodee wuriichibeen-na gishshawu ufayttays.”

QOHETTIDOBAA

Nuna ‘Hanqqetissiyaabay’ De’iyo Wode

“Nu gubaa’iyan de’iya issi michiyaa tana, ‘Ta miishshaa wuuqqadasa’ gaada mootaasu. Gubaa’iyan de’iya harati hegaa siyidi i bagga gididosona. Guyyeppe, a taani moorabeennaagaa akeekidoogaa tawu yootaasu. A maarotaa oychidaba gidikkokka, a oottidobay tana keehi qohido gishshawu taani iyyo mule atto gaana danddayennabadan qoppaas.”—Linddo.

NE HANOTAYKKA issi michee hanotan keehi qohettida Linddiigaa malee? Harati haniyoobaanne oottiyoojaa gaasuwan issoti issoti ayyaanaaban oottiyo issi issibaa aggidoojee keehippe azzantiyaaba. Ne hanotaykka hegaa malee?

“Xoossaa Siiquwaappe Nuna SHaakkanau” Danddayiya Uri De’ii?

Yihoowa Markka gidida uri nuna qohiyo wode ayyo atto giyoogee metiyaaba gidana danddayees. Gidikkokka, Kiristtaaneti issoy issuwaa siiqana bessees. (Yohaannisa 13:34, 35) SHin nuna qohiday Yihoowa Markka gidikko, keehi yiilotananne azzanana danddayoos.—Mazamure 55:12.

Issi issitoo Kiristtaaneti issoy haraa ‘hanqqetissiyaabaa’ oottana danddayiyoogaa Geeshsha Maxaafay yootees. (Qolasiyaasa 3:13) Hegaa eriyaaba gidikkokka, hegee nu bolli gakkiiyo wode hegaa waati oyqqanaakko metootana danddayoos. Hegaa malabay gakkiiyo wode, nuna maaddana danddayiyaabi de’ii? Ane heezzu Geeshsha Maxaafaa maarata akeeka:

Saluwan de’iya nu Aaway hanidabaa ubbaa erees. Yihoo way nu bolli gakkida pirdda paacanne hegee nu bolli kaalettidobaa gujjiin, ubabaa be’ees. (Ibraawe 4:13) Hegaa bollikka, nuuni waayettiyo wode i nuussi azzanees. (Isiyaasa 63:9) Qassi “waayee woi tuggai,” woy hara aybinne, ubba Yihoowa ashkara gidida urikka nuna ‘Xoossaa siiquwaappe shaakkanaadan’ i paqqadenna. (Roome 8:35, 38, 39) Hegee

nuunikka *aybinne* woy *ooninne* nuna Yihoo wappe shaakkanaadan paqqadennan aggiyoogan a leemisuwaa kaallanaadan denttettennee?

Atto giyoogee naaqqetidobaa xaasayi xeelliyoojaa bessiyaaba gidenna. Nuna naaqqidaageetuyyo atto giyoogee nuuni he mooruwaa xaasayi xeelliyoojaa, eti nuna naaqqidoogee bessiyaaba gidiyoojaa woy naaqqetidobay nuna darin qohibeennaagaa bessiyaaba gidenna. Yihoo way nagaran mule *ufayttennaba* gidikkokka, issi uri ba nagaraappe simmiyo wode *maariyoojaa* hassaya. (Mazamure 103:12, 13; Imbbaaqooma 1:13) Yihoo way nuuni haratuyyo atto gaanaadan minttettiyoy, nuuni a milatanaadan koyiyo gishshataassa. I “merinau hanqqettenna.”—Mazamure 103:9; Maatiyoosa 6:14.

Lanccennan aggikko go’ettiyay nuna. Waanidi? Ha leemisuwaa qoppa. Deexxiya shuchaa guutta wodi yawu tookkada takkanawu baaxetaasa. Guutta daqiiqawu hegaa tookkanawu metootennan aggana danddayaasa. SHin hegaa daro daqiiqawu tookkada takkanawu baaxetikko, neeni waanane? Hegaa tookkada amarida daqiiqawu, saatiyawu woy hegaappe dariya wodi yawu takkana danddayay? Yaatikko, ne keehi daafurana! Hegee hanidoy shuchaa deexoy gujjido gishshataassa gidennaagee qoncce. SHin hegaa tookkada daro wodi yawu takkikko keehi daafuraasa. Lancciyaa uluwan oyqqiyoogee kka hegaa mala. Guuttabankka gidin, nuuni lanccidi daro wodi yaa takkikko keehi qohettoos. Hegaa gishshawu, nuuni lancciyaa uluwan oyqqennaadan



Lancennan aggikko go'ettiyay nuna

Yihooway zoriyoogee garamissiyaaba gidenna. Tumakka, lancennan aggikko go'ettiyay nuna. —Leemiso 11:17.

“Yihooway Ba Huuphe Tana Haasayissiiddi De'iyabadan Qoppaas”

Issi Yihoowa Markkiyaa o yiilloyiyaabaa haninkka Lindda uluwan lancce oyqennaadan maaddiday aybee? O maaddidabatuppe issoy, nuuni maarana bessiyo gaasuwa Geeshsha Maxaafay yootiyoobaa wotta denttada qoppidoogaa. (Mazamure 130:3, 4) Linddo maaddida waannabay nuuni haratuyyo atto giikko, Yihoowaykka nuuyyo atto

giyoogaa eridoogaa. (Efisoona 4:32–5:2) A hegaadan qoppidoogee o waati maaddidaakko hassayada a, “Yihooway ba huuphe tana haasayissiiddi de'iyabadan qoppaas” yaagasu.

Wodeppe guyyiyan, Lindda lancciyooqaa aggaasu. A he micheeyyo coo atto gaasu; hegaappe denddaagan, ha"i eti ulo lagge. Ha"i Lindda Yihoowawu minnada oottaydda de'awusu. Neenikka hegaadan oottanaadan Yihooway maaddanaagaa ammanetta.



Meero giyo michiyaa, “Harati qohido gishshawu taani yiillotada tumaa aggabayas” yaagaasu. SHin a nu xuufeta nabbabiyoogee Yihooway keehi siiqiyaanne lo'o Xoossa gidiyooqaa akeekanaadan maaddiis. A gujjadakka, “Taani hegaa nabbabido gishshawu, kaseegaadan Yihoowa siiqiyoogaa doommaas” yaagaasu. Xoossaa siiqiyoogaa giyoogee woygiyoogaakko loytta akeekanawu, ‘Xoossaa Siiquwan De'a’ giyo maxaafaa nabbaba. Hegee jw.org/wal sayttiyan de'ees.

ZIL"ETTIYOOGAA

“Ta Nagaraappe Tana Geeshsha”

“Ta ooratta oosoy nu soo asay kaseegaappe ishalidi de’anaadan maaddiis; shin taani Yihoowa ufayssenna darobaa oottanaadanka denttettiis. Baalaa bonchiyoogaa, polotikaa-ra gayttidabaa oottiyoogaa, ubba woosa keetti biyoogaa doommaas. Taani Yihoowa Markka gidikkonne, 40 layttawu gubaa’iyaappe haakkada takkaas. Taani hegaadan hanidaashin daro wodee aadhido gishshawu mule Yihoowa maarotaa demmana danddayennabada qoppaas. Ubbaa taani ta huuphiyawukka atto gaana danddayiyaabada qoppabeykke. Hegaa bollikka, bashshawu efiya ha ogiyan hemettiyoogaa doommanaappe kasekka tumaa erays.”—Martto.

ZIL"ETTIYOOGEE keehi narphiya tooho mala. Kawuwaa Daawiti, “Ta iitatetta di7uwaadan tana muukkiis; denddena gita toohuwaadan taayyo deexxees” yaagiis. (Mazamure 38:4) Issi issi Kiristaaneti Yihooway bantta nagaraa mule atto gaana danddayennabada qoppidi, keehi daro azzanoosona. (2 Qoronttoosa 2:7) SHin hegaadan qoppiyoogee bessiyaabee? Neeni wolqqaama nagaraa oottidaba gidikkokka, Yihooway neeyyo mule atto gaana danddayennaagaa keenaappe haakkadasa giyoogee? CHii, hegaadaana gidenna!

“Ane Zorettoos”

Bantta nagaraappe simmiyaageeta Yihooway yeggenna. Ubbaa i etakko shiiqeese! Miishshaa laalida na’aa leemisuwan, Yesuusi he na’ay so asaappe haakki biidi maari baynna de’uwaa de’idoogaa yootiis; qassi Yihooway qarettiya he na’aa aawa mala gidiyoogaa yootiis. Guyyeppe, na’ay soo simmanawu koyiis. “[Na’ay] biron haahuwan de7ishin, a aawai a be7idi, ayyo mishettiis; woxxi qoommidi, a yeriis.” (Luqaasa 15:11-20) Neeni Yihoowakko shiiqanawu koyiyaaba gidikkokka, appe “haahuwan” de’iyaabada qoppay? Yesuusi yootido leemisuwan qonccida aawaadan Yihoowaykka neeyyo qarettees. I nena mokkanawu yeemottees.

SHin neeni ne nagaray Yihooway atto gaana danddayennaagaa keena daronne wolqqaama gaada qoppiyaaba gidikko shin? Isiyaasa 1:18n de’iya Yihoowa shoobiyaa akeeka: “Haayite; ane zorettoos. Intte nagarai baaraadan zo77ikkokka, shachchaadan booxxana; sinadan zo77ikkokka, puuttodan booxxana” yaagiis. Ee, bootta carqqiyaa bolli de’iya zo’o qalamiyaadan qucettidi xayana danddayennaba milatiya nagaraakka Yihooway atto gees.

Yihooway neeni oottido nagaraa gaasuwan ubbaato zil"ettaydda de’anaadan koyenna. Yaatin, neeni waatada Yihoowa maarotaa demmananne ne kahay qum'ennaadan oottana, qassi hegaappe denddidaagan woppu gaana danddayay? Kawuwaa Daawiti oottido naa'ubaa akeeka. Koyruwan i, “Ta mooruwaa GODAASSI paaxana” yaagiis. (Mazamure 32:5) Yihooway neeni akko woossanaadaaninne aara ‘zorettanaadan’ *neena shoobbi uttoogaa* hassaya. He shoobiyaa ekka. Ne nagaraa Yihoowassi paaxa; qassi neeyyo siyettiyaabaa ayyo yoota. Daawiti ba de’uwan be’idobaa hassayidi, “Ta nagaraappe tana geeshsha. . . . Abeet Xoossau, ‘Nagara oottennan aggarkkinaashsha’ giya, meqqida wozanaa neeni karakka” yaagidi ammanettidi woossiis.—Mazamure 51:2, 17.

Naa'anttuwan, Daawiti Xoossay akko kiittido, hanabaa yootiya Naataani bana maaddanaadan



Yihooway ne kahay nena qum'ennan woppu gaada de'anaadan koyees

eeno giis. (2 Sameela 12:13) Ha wodiyan, Yihooway bantta nagaraappe simmiyaageeti banaara kaseegaadan dabbotanaadan maaddana mala gubaa'e cimata suntti wottiis. Cimati nena haasayissiyo wode, Geeshsha Maxaafaa go'ettiyoogaaninne wozanappe woossiyoogan nena gazdissananne nena un'issiyaabaappe woppissana; qassi ayyaanaaban nena pattana.—Yaaqooba 5: 14-16.

'A Mooroy Atto Geetettido Uri Anjettidaagaa'

Ne nagaraa Xoossaa Yihoowawu paaxiyoogeenne cimatuuyo yootiyoogee harabaappe aaruwan nena deexxana danddayiyoogee tuma. Daawitika yayyennan aggenna. I ba nagaraa "paaxennan" amarida wodiya takkiis. (Mazamure 32:3) SHin ba nagaraa paaxidi ba hemetaa suurissiyoogee a maaddiyaaba gidiyoogaa i guyyeppe akeekiis.

I demmido anjuwaappe waannay kaseegaadan ufayttidoogaa. I, "A mooroi atto geetettidonne a nagarai kamettido urai anjettidaagaa" yaagiis. (Mazamure 32:1) I gujjidikka, "Abeet Godau, ta doonaa dooya; yaatikko, ta inxxarssai ne gala-

taa awaajjana" yaagidikka woossiis. (Mazamure 51:15) Daawiti ba nagaraappe geeyidonne Xoossaa maarotaa nashshido gishshawu Yihoowabaa haratuuyo yootanawu koyiis.

Yihooway ne kahay nena qum'ennan woppu gaada de'anaadan koyees. Qassi neeni zil'et-taydda gidennan, wozanappe ufayttaydda abaanne a halchuwaabaa haratuuyo yootanaadankka koyees. (Mazamure 65:1-4) Yihooway 'ne nagaray xayanaadaaninne a matappe ayyanaa minotettaa wodee neeyo yaanaadan' amottiyoogaa hassaya.—Oosuwaa 3:19, 20.

Marttakka hegaadan woppu gaasu. A hagaadan gaasu: "Ta na'ay *Wochiyo Keelaanne Beegottite!* maxeetiyyaa aggennan tawu kiittees. Wodiyaappe wodiyan, zaarettada Yihoowabaa loytta akeekaas. Yihoowakko simmanawu tana deexxida waannabay ta oottido nagara ubbawu maarotaa oychiyoogaa. SHin wurssettan, Yihoowakko woossaas; qassi tawu atto gaanaadan oychaas. Taani Yihoowakko simmennan 40 layttay aadidoogee ammananawu metiyaabaa. Ayyo oottiyoogaa aggidi keehi daro layttawu takkida urikka baakko simmanaadan Yihooway hanotaa giigissiyooogawu ta de'uan hanidabay markka."



5 Ne “SHemppuwaa Heemmiyaagaakkonne Naagiyaagaakko” Simma

Ha brooshuriyan odettida metotuppe issoy way daroy ne bollikka gakkidee? Yaatikko, heгаа mala metoy gakkiiyoy ne xallaa gidakka. Xoossawu ammanettidi oottida, beni wode de’ida daro asata gidin ha wodiyan awu ammanettidi oottiya darotakka heгаа mala paacee gakkiiis. Eti Yihoowa maaduwan he paaciyaa xoonidoogaadan neenikka xoonana danddayaasa.

“Yihooway *tana* mule aggibeenaaqaa akeekaas;
taappe koyettiyay *akko* simmiyoogaa xalla”

NEENI akko simmiyo wode, Yihooway nena maaddanaagaa ammanetta. Nena un'issiyaabaa genccanaadaaninne qohidabaa giigissanaadan, qassi qum'enna kahaa demmada ufayttanaadaaninne woppu gaanaadan Yihooway maaddana. Yaatin, neeni hara Yihoowa Markkatuura kaseegaadan Yihoowayyo oottanawu koyana. Ne hanotay koyro xeetu layttan de'ida amarida Kiriistaanetuugaa mala gidana. Kiiittida PHeexiroosi, “Intte oge balida dorssa mala; shin ha77i intte shemppuwaa heemmiyaagaakonne naagiyaagaakko simmideta.”—1 PHeexiroosa 2:25.

Yihoowakko simmiyoogee neeni oottana bessiya waannaba. Aybissi? Yaatikko Yihoowa ufayssaasa. (Leemiso 27:11) Nuuni oottiyoobay Yihoowa ufayssees woy azzanttees. Yihooway nuuni a siiqanaadan woy ayyo oottanaadan gidennaagee erettidaagaa. (Zaarettido Wogaa 30: 19, 20) Geeshsha Maxaafaa erancha gidida issi bitanee he xiqisiyaa qofaa hagaadan giidi qonccissiis: “Hara uri ne wozanaa dooyana danddayenna. Ne wozanaa dooyana bessiyyay nena.” Yihoowa wozanappe siiqidi awu oottiyo wode, nu wozanaa dooyoos. Nuuni hegaadan oottikko, Yihoowa keehi ufayssiya al'o gididabaa awu immoos; hegeekka, nuuni awu wozanappe aqidaageeta gidiyooqaa bessoos. Tumakka, Yihoowawu goynniyoogan ayyo bessiyaabaa immiyoogaappe aadhidi nuna ufayssiya harabi baawa!—Oosuwaa 20:35; Ajjjuutaa 4:11.

Hegaa bollikka, zaarettada Yihoowawu oottiyoogaa doommiyo wode ayyaanaaban neeyyo koshshiyaabaa demmaasa. (Maatiyoosa 5:3) Waatada? Kumetta sa'an de'iya asay, ‘Nuuni ha sa'an de'iyoy aybisse?’ yaagidi oychees. Qassi de'uwawu halchettidabi aybakko eranawu asay keehi koyees. Etawu hejaa mala koshshay de'idoy Yihooway asi hejaa malabaa koyanaadan oottidi medhido gishshataassa. I nuuni awu haggaziyoogan ufayttanaadan oottidi medhiis. Nuuni Yihoowawu oottiyooy a siiqiyo gishshataassa gidiyooqaa eriyooqan ufayttiyoogaa keeni hara

aybinkka ufayttana danddayokko.—Mazamure 63:1-5.

Hayyanaa, Yihooway neeni akko simmanaadan koyiyooqaa hassaya. Hegaa waata erana danddayay? Ane haggaa qoppa: Ha brooshuriyaa daro woossidinne qoppidi giigissida. Qassi neenikka hejaa demmadasa; geella hejaa gubaa'e cimay woy Yihoowa Markka gidida hara uri neeyyo immennan aggenna. Neenikka ha xuufiyaa nabba-bada an de'iya zoriyaa oosuwan peeshshanawu murttadasa. Hagee ubbay Yihooway nena dogibeenaaqaa bessiya naqaasha. Ubba, i qaretan nena zaarettidi baakko ehiiddi de'ees.—Yohaannisa 6:44.

Awu oottiyoogaa aggida ba ashkkarata Yihoo-way mule dogennaagaa eriyooqee keehi minttettiyaaba. Doono giyo michiyaa hegee tuma gidiyooqaa ba de'uan akeekaasu. A hagaadan gaasu: “Taani leddan leddan tumaa ogiyaappe wora simmaas; shin darotoo Mazamure 139: 23, 24n de'iya qofaa hassayanaadan oottiyaabay ta de'uan haniis. Xiqisee, ‘Abeet Xoossau, tana qorada, ta wozanaa era; tana paaccada, ta qofaa era. Ane tanan iitabai de7ikko xeella; xeellada, merinaa ogiyan tana kaaletta’ yaagees. Taani alamiyaa bagga gidennaagaa, ubba alamee tawu mule injjetennaagaanne taani de'ana bessiyooy likke sohoy Yihoowa dirijjitiyaa giddoona gidiyooqaa erays. Yihooway *tana* mule aggibeenaaqaa akeekaas; taappe koyettiyay *akko* simmiyoogaa xalla. Qassi akko simmidoogan keehi ufayttays!”

Neeni zaarettadakka Yihoo-wappe beettiya ufays-saa demmanaadan wozanappe amottoosinne woossoos. (Nahimiyya 8:10) Yihoowakko simmiyoogan mule zil'ettakka.

Neeni akko simmiyo wode,
Yihooway nena maaddana

Yihoowakko Simmiyoogaara Gayttida Oyshatu Zaaruwaa

KOYRO WAATANA BESSII?

Sahettidi takkida uri kaseegaadan ba meezetidobaa oottanawu amarida wodiya koshshana danddayees. Neenikka hegaa-dan amarida ayyaanaabaa qumaa galla galla miyoogan kaseegaadan mino Kiristaane gidana danddayaasa. Neeni ubbabaa issi kutti kaseegaadan oottana bessiyaabadan qoppoppa. Geella guutta daqiiqawu Geeshsha Maxaafaa nabbabana woy appe duuqqido amaridabaa siyana, nu xuufetuppe issuwaa xanna'ana, jw.org sayttiyaa xomoosana danddayaasa. Qassi danddayido peeshshan sohuwara gubaa'e shiiquwaa shiiqa. Ubbaappe aaruwan Yihoowakko woossa, qassi i maaddanaadan oyca. 'I neeyyo qoppiyo gishshawu, nena hirgissiyaa ubbabaa a bolli ola.'—1 PHeexiroosa 5:7.

“Haggaaziyoogaanne gubaa'iyaa hashetiyoogaa aggido gishshawu, Yihoowakko woossanawukka yeellataas. Taani xalada woossin gubaa'e cimay tanaara gayttidi haasayissiis. He ishay Yihoo-way tana laamettana danddayenna asadan xeellibeennaagaa akeekanaadan maaddiis. He ishay taani minettanaadan Geeshsha Maxaafaa galla galla nabbabiyoogaa doommaana mala zoriis. Heegaadan oottidoogee zaarettada gubaa'e shiiquwaa baanawu xalaanaadan maaddiis. Takkada, haggaaziyoogaakka doommaas. Yihoo-way tana laamettana danddayenna asadan xeellibeenna gishshawu keehi ufayttays.”
—Eevo.

GUBAA'IYAN DE'IYAAGEETI TANA WOYGANEE?

Gubaa'iyana de'iyaa geeti nena ufayssan mokki ekkanaagaa ammanetta. Eti nena borokkona woy ne bolli pirdokkona; ubba eti nena minttettanawu banttasi danddayettida ubbabaa oottana.—Ibraawe 10:24, 25.

“Kawotettaa Addaraashaa zaarettada baanawu yeellataas. Tana kase eriya asay woyganeeshsha gaada yayyaas. SHin 30 layttappe kase he gubaa'iyana de'ida issi cima michiyaa, 'Ta na'awu ne soo hashshu saro yaasa!' yaagaasu. Hegaa siyada keehi ufayttaas. Tumakka taani ta soo simmaas.”
—Kaviyera.

“Taani Kawotettaa Addaraashaa baada, ooninne tana erenna mala guyyeera de'iyaa wurssetta oydiyan uttaas. SHin daroti taani naattetan de'aydda gubaa'iyaa yiyoogaa akeekidosona. Eti tana qoommido loyyti sarotido gishshawu woppu gaas. Tawu soo simmidabadan siyettiis.”—Marka.

CIMATI TANA WAATI MAADDANEE?

Cimati nena kehatettan oyqqana. Ubba eti neeni 'ne kase siiquwaa' zaarettada bessanawu koyido gishshawu, nena nashshana. (Ajuutaa 2:4) Neeni mooridobaa giigissanaadan cimati nena maarotettaaninne “ashkкетetta ayyaanan” maaddana. (Galaatiyaa 6:1; Leemiso 28:13) Eti *Merinawu Ufayttada De'a!* woy *Yihoowakko SHiiqa* giyo xuufiyaa issi uri nena xanna'issanaadan hanotaa giigissana. Cimati ne oge ubban nena minttettanaagaanne maaddanaagaa ammanetta.—Isiyaasa 32:1, 2.

“Taani haggaaziyoogaanne gubaa'iyaa biyoogaa aggada takkido hosppun layttatun cimati aggenan tana xomoosidosona. Issi gallassi, gubaa'e cima gidida issi ishay kase tana haratuura denttido pootuwana bessii. Hegee lo'o gidida darobaa tana hassayissido gishshawu, zaarettada Yihoo-wawu oottiyoogaa doommiyoogan kaseegaadan ufayttanawu koyaas. Cimati taani ayyaanaabaa kaseegaadan oottanaadan maaddidosona.”—Viktora.



Yihoowayyo Yexxite giyo nu mazamure maxaafan, neeni ayyaanaabaa zaarettada oottiyoogaa doommiyo wode keehi minttettiyaanne wozanaa denttettiya daro mazamureti de'oosona. Leemisuwawu mazamure paydo 38 danttuwaa wotta denttada qoppa. Koyro PHeexiroosa 5:10ppe eketiida he mazamuriyaa huuphe yohoy, 'I Nena Minttana' yaagees.



'I Nena Minttana'

Xoossay halchidi nena ba tumaa sissiis

Xumaappe poo'uwwu yaanaadan xeesiis.

Neeni a koyada suurebaa oottanawu,

Wozanappe amottiyoogaa be'iis.

Ne a sheniyya polanassi woossin,

Nena maaddiis, i awudekka maaddees.

Xoossay ba siiqo Na'aa ne gishshawu immiis;

Nena maaddana, minttana koyees.

Ba siiqiyo mexi issi Na'aa immikko,

I nena minttanaagaa siroppa.

Ne ammanuwaanne siiquwaa dogenna;

I baageeta ubbatoo naagana.

(AZMAACHIYAA)

Xoossay Yesuusa suuttan nena babaa oottiis.

I nena loyttana, tumakka minttana.

I nena maaddananne nena naagana.

Ee, nena loyttana; tumakka minttana.



Ha mazamuriyaa muuziqaanne Kawotettaa mazamure gidida haratu muuziqa siyanawu, kooddiyaa iskaane ootta woy jw.org xeella.





Keeki minttettiya gubaa'e shiiquwan, ufayssiya gita shiiqotun, haggaa zuwan, woy Yihoowa Markka gidida issi uraara minttettiyaabaa haasayiyoogan Yihoowa asaara aattido ufayssiya wodiya'a hassaya eray? Hegee neeni Yihoowa dogabeennaagaa, qassi ikka nena dogibeennaagaa bessiyaaba. Yihooway neeni ammanettada awu oottidoogaa hassayidi ufayttees. Qassi neeni akko simmanaadan maaddanawu amottees.

Yihooway hagaadan gees: “Taani ta huuphen ta dorssata xomoosananne koyana. Henttanchchai ba dorssatuppe bayin koyiyoogaadan, taanikka ta dorssata koyana; . . . eti laalettido soho ubbaappe taani eta shiishshana.”—Hizqqeela 34:11, 12.

Ha xuufee bayzettiyaaba gidenna. Kumetta sa'an Geeshsha Maxaafaa tamarissanawu giigissiyoobaappe issuwaa; he oosoy asay ba dosan immiyo miishshan oosettees.

Miishsha immanawu koyikko, donate.jw.org/wal xomoosa.

Hara qonccisoy imettana xayikko, xiqiseti ekettidoy Wolayttatto Geeshsha Maxaafaappe. “NW” giyaagee, xiqisee Ooratta Alamiyaa Geeshsha Maxaafaappe ekettidoogaa bessees.

Yihoowakko Simma
Return to Jehovah
Ichchasha 2023n Attametidaagaa
Wolaita (rj-WL)

© 2015
WATCH TOWER BIBLE AND TRACT
SOCIETY OF PENNSYLVANIA

Attamissidaageeta
© Wachturm Bibel- und
Traktat-Gesellschaft, Selters/Ts.
Made in Germany

jw.org sayttiyaaw
xeella woy kooddiyaa
iskkanee ootta



rj-WL
230120



Yihoowa Markkati
go'ettiyo Weybsayttiyaaw